

ԿԱՐԵՆ ՀՈՎՀԱՆՆԻՍՅԱՆ
ՀԱԻ

ԹՈՒՒՄ ՄԱՆՈՒԿԸ ԲԱՆԱՀՅՈՒՍԱԿԱՆ ՍԿԶԲՆԱՂԲՅՈՒՐՆԵՐՈՒՄ

Թուիս Մանուկ սրբավայրերը¹ բավականին հայտնի են Հայաստանի Հանրապետությունում, ժամանակին տարածված են եղել նաեւ Հայկական լեռնաշխարհի այլ շրջաններում: Կան բնակատեղիներ, որտեղ առկա են երկու եւ ավելի Թուիս Մանուկներ, որոնք իրարից շատ տարբեր են՝ որպէս կառույցներ եւ պաշտամունքի միավորներ:

Պաշտամունքն ինքնին ենթադրում է որոշակի արարողությունների համալիր (ծես)՝ միտված կոնկրետ նպատակներին: Հաճախ ծեսերն ունենում են առասպելական հիմք: Սակայն հազվադեպ չեն առասպելական պատումները, որոնք չունեն ծիսական արտահայտություններ²: Թուիս Մանուկների պաշտամունքում գերակայում է հենց այս տիպը. ծիսական արարողություններն այստեղ հիմնականում դուրս են մնում պատումային դաշտից, այսինքն՝ ամրապնդված չեն առասպելներով ու զրույցներով:

Սույն հոդվածում կներկայացվի Թուիս Մանուկ սրբավայրերին առնչվող բանահյուսությունը, որի մի մասը քաղված է հրատարակված աղբյուրներից³, մյուս մասը՝ մեր դաշտային հետազոտություններից⁴: Բանահյուսական նյութը ստորաբաժանել ենք հետեւյալ սկզբունքով. ավանդություններ, երգեր, բանահյուսական մանր ժանրեր՝ աղոթք, երգում եւ այլն: Հոդվածն ամենեւին մտադրություն չունի լիովին սպառված համարել Թուիս Մանուկներին վերաբերող բանահյուսական նյութի քննարկումը, քանի որ նրանում ընդգրկված չեն բոլոր Թուիս Մանուկ-

¹ Թուիս Մանուկների վերաբերյալ առկա են ընդամենը մի քանի հոդվածներ, որոնք հիմնականում անփոփոխ են Թուիս Մանուկ (ստաշիջանի նյութեր), Երեւան, 2001, ժողովածուում:

² В. Тэрнер, Символ и ритуал, Москва, 1983, с. 42.

³ Համապատասխան աղբյուրներից քաղված նյութը բերվում է առանց փոփոխության:

⁴ Ներկայացվում են ՀՀ ուխտավայրերը եւ ուխտագնացությունները, դրանց հետ կապված բանահյուսությունը ուսումնասիրող աշխատանքային խմբի հետազոտության արդյունքները 2011-2015 թթ. ընթացքում:

ները. դաշտային հետազոտությունները դեռ չարունակվում են: Առաջմ դուրս են մնում Շիրակի եւ Վայոց Ձորի մարզերը:

Ավանդություններ

Թեեւ թուխ Մանուկ սրբավայրերը սփռված էին Հայոց լեռնաշխարհի բազմաթիվ շրջաններում, այնուամենայնիվ, դրանց վերաբերյալ ավանդազրույցներն այնքան էլ չատ չեն եւ հիմնականում վերաբերում են թուխ Մանուկ սրբավայրերի ծագմանն ու թուխ Մանուկի կերպարին:

Ավանդությունների առաջին խմբի պատումները պատմում են թուխ Մանուկների ինքնուրույն մասին: Դրանք պայմանականորեն կարելի է բաժանել չորս խմբի՝ ա. թուխ Մանուկ՝ օտարազգի երեխա, բ. թուխ Մանուկ՝ Քրիստոս, գ. թուխ Մանուկ՝ հերոս-նահատակ, դ. թուխ Մանուկ՝ զորատու:

Բուլանլի գավառի Համգա-Շեյի գյուղի Թուխ Մանուկ. «Թուխ Մանուկը Համգայ անուն չէյիսի որդին կը լինի. 5-6 տարեկան եղած ժամանակ, Հայոց տղաքներու նման ականջները գինդ անցկացնելով կերթար քահանաներու մօտ եւ կը կարգար Հայոց լեզուով: Շէյի Համգան իմանալով, մանուկ որդին գիւղից դուրս տանելով սրախողխող կանէ, եւ անհաւատներու հետ նստելու կանգնելու համար կը կանչէ Հայերը եւ որդու պիղծ մարմինը կը յանձնէ սոցա: Փոքրիկ նահատակի վրայ աչկարայ լոյս իջնելով, հայերը մատուռ կը կանգնեցնեն վրան եւ կանուանեն թուխ Մանուկ: Ոմանք կստուգաբանեն իբր թուխ-լամուկ, այսինքն՝ սեւ լամուկ, որ կը նշանակէ՝ թուխ-որդի (քրդ.), որովհետեւ լամուկ բառը քրդերէնի լաւ կամ լաւէ բառերու փոփոխած ձեւն է»⁵:

Աշրարալի Թուխ Մանուկ. «Մի արեւկող այգու անկյունում այսօր էլ դեռ կանգնած է Հնձանաբազը: Այդ մի ավերակ է, որի գազաչափ երկարությամբ քառանկյունի կոփածո քարերի երեսները ժամանակին մաշող զորությունից տեղ-տեղ խորդուբորդվել են: Ամենաքիչը 700-800 տարի հնությունն են: Հնձանաբազը դարերով ոչ միայն աղամորդու ոտք չի մտել, արեւն ու անձրեւն էլ դժվար են թափանցել: Հինավուրց հաստաբուն թեղի ծառի խիտ եւ անխնամ ոստերն են հովանավորել ամբողջ ավերակի վրա, ծառը ճյուղերը վրանանման կռացրել է ավերակի վրա եւ փռել մինչեւ գետին: Թեղուն դիպչելը մեղք էր, թեղին թուխ-մանուկի տնկածն էր. գյուղի երեխան էլ գիտեր, որ թեղու ոչ մի ճեղքին դանակ, էտոց, կա-

⁵ Բենսէ, Բուլանլի կամ Հարք գաւառ, Հավատք, ԱՀ, հ. Զ., Թիֆլիս, 1900, էջ 25-26:

ցին չպետք է դիպչեր, ապա թե ոչ արյուն դուրս կգար: Թեղին հենց ինքը թուխ-մանուկն է, բարակ ոստերը թուխ-մանուկի երակներն են, իսկ տերեւները նորա գգգզված մազերն են: Թուխ-մանուկը մերձակա պարսկական գյուղի մոլլի որդին էր. նա քրիստոնյա էր դառել, նրա մոլեռանդ հայրը կամեցել է որդուն սպանել, հալածելով հասցրել է մինչեւ այս գյուղի Հնձանաբազը: Մանուկը տեսնում է, որ հայրը հասվեհաս է, խնդրել է Աստծուն, որ իրան ծառ չինի, հոր ձեռքից ազատի: Խնդիրքը կատարվել է. մանուկի գգգզված մազերը ճղքներ են դարձել եւ մոլլի մտնելուն արգելք եղել: Կատաղած մոլլեն թրով տվել է ծառի մի ճյուղքը քերծել: Այսօր էլ կտեսնես քերծված տեղում չորացած ու սեւացած արյունը»⁶:

Այս ավանդույթյունը բառացի մեջբերում է Ե. Շահագիզը, միայն պարսիկի փոխարեն հերոսը թուրք երեխա է⁷: Շահագիզի ժամանակներում, այսինքն՝ Ի. դ. առաջին տասնամյակներում, Աշտարակում գտնվող այս թուխ Մանուկն այլեւս գոյություն չուներ⁸:

Գեղիովիյրի Թուխ Մանուկ. «Թուխ Մանուկ է կոչվում սեւ մաշկով մանուկի համար, որը հայ չի եղել»⁹:

Որոշ դեպքերում անմիջականորեն հայտնում են, որ թուխ Մանուկը հենց Հիսուս Քրիստոսն է: Հիմնականում դա պարզապես հավատք է¹⁰, բայց երբեմն այն հանդես է գալիս նաեւ ավանդույթյան տեսքով:

Ալափարսի Թուխ Մանուկ. «Թուխ Մանուկը շատ մեծ պաշտպան է: Ինքը Հիսուս Քրիստոսն է: Նա թուխ է եղել, երկրով շրջելիս բոլոր վայրերում, ուր գիշերել, պաշտպանություն է գտել, հանգստացել է, այդ տեղերն իր անունով կոչվել են Թուխ Մանուկ: Երբ հոգեպես կամ մարմնապես նեղվում ես, կարող ես գալ աղոթելու՝ դա է փրկության ճանա-

⁶ Պ. Պողոսյան, Ցեցեր, Երկերի ժողովածու յոթ հատորով, հ. 3, Երեւան, 1963, էջ 403-404: Այս Թուխ Մանուկը նաեւ օձերի թագավորի պալատն է, այս ավանդությունը տես վեպի շարունակությունում, էջ 404-405: «Հնձանաբազ-Արարատյան աշխարհի այգեշատ գյուղերի այգիների մեջ տեղ-տեղ մնացած էին հնձանների ավերակներ են, հնձանատեղիներ: Հնձանաբազը դրսից ոչինչ չի ներկայացնում. այգետերերը թափված քարերը ժողովել են ու թափել ներսը, գավթի մեջ» (բացատրությունը՝ Պ. Պողոսյանի):

⁷ Ե. Շահագիզ, Աշտարակի պատմությունը, Երեւան, 1987, էջ 218-219:

⁸ Նույն տեղում, էջ 223:

⁹ Լ. Սիմոնյան, Կ. Հովհաննիսյան, Դաշտային ազգագրական նյութ (այսուհետ՝ ԴԱՆ), Գեղարքունիք, Գեղիովիտ, 2013, ասացող՝ Կիրով Մովսիսյան, 1939 թ. ծնվ.: Հնարավոր է, որ Գեղիովիտում էլ է եղել ավանդություն, ըստ որի՝ Թուխ Մանուկը օտարագրի երեխա է եղել, ով ընդունել է քրիստոնեությունը եւ դրա համար սպանվել:

¹⁰ Դաշտային հետազոտության ընթացքում այն հարցին, թե ով է Թուխ Մանուկը, հաճախ ուղղակի պատասխանում են տրված հարցին, երբեմն՝ պատմում ավանդագրույցը, ինչպես Քուչակի Թուխ Մանուկի դեպքում Բուրիկ մայրիկն ուղղակի պատասխանում է. «Սուրբ Կարապետն ի, Հիսուսի քավորն ի»:

պարհը: Քանի որ Հիսուս մահացել է 33 տարեկան ու չամուսնացած, դրա համար Մանուկ է»¹¹:

Արևշարի Եղիշի տան Թուխ Մանուկ. «Փոքր, մանուկ Քրիստոս է, ով ամպի վրա նստած՝ երբեմն իջնում է մատուռի վրա»¹²:

Մասրարայի Թուխ Մանուկ. «Թուխ Մանուկը Քրիստոս է, երբ ծնվում է, ասում են՝ ծնվավ Թուխ Մանուկը»¹³:

Հացաշենի Թուխ Մանուկ. «Թուխ Մանուկն ինքն՝ Աստված է: Նա գաղտնի է եկել, որպես մանուկ, ծնվել է կնոջից: Մնվելու ժամանակ, երբ մարդիկ եկել են այցի, տեսել են, որ Թուխ երեխա է: Դրա համար Թուխ Մանուկի ուխտը իր ծննդյան օրն է՝ սեպտեմբերի առաջին շաբաթը»¹⁴:

Թուխ Մանուկների մասին ավանդույթյունների մյուս խումբն են կազմում այդ սրբավայրերի ծագման մասին պատմմաները:

Կապուտանի Թուխ Մանուկ. «Մի ժամանակ լուր է տարածվում, որ Կապուտանում մի բլրի վրա սուրբ կա, որ տղա երեխաներ է տալիս, երբ մատաղ ես անում: Մի մարդ, աղջիկ երեխաներ ունեւ, բայց տղա էր ուզում, մատաղ է վերցնում ու գալիս է Կապուտան, սրբի մոտ: Մառախուղ է լինում, մոտակա ժայռի վրա ժամի նման¹⁵ մի բան է նկատում (այժմյան Թուխ Մանուկը), մտածում է, որ վերջապես գտավ սրբին: Իրականում նրանք փնտրում էին Կապուտանի Ս. Մինաս վանքը, որ գտնվում է Թուխ Մանուկ ժայռի դիմացի բլրին: Մառախուղի պատճառով նրանք բլուրը չփոթում են ժայռի հետ: Բարձրանում են ժայռը, մատաղ են անում, ուտում-խմում, հեռանում են: Ինը ամիս հետո մի տղա՝ Թուխ մանուկ, սեւուկ երեխա են ունենում, անունն էլ դնում են հենց Թուխ Մանուկ:

¹¹ Լ. Սիմոնյան, Կ. Հովհաննիսյան, Ն. Շամամյան, ԴԱՆ, Կոտայք, Ալախարա, 2014, ասացող՝ Լաուրա Կարապետյան, 1948 թ. ծնվ.:

¹² Լ. Սիմոնյան, Կ. Հովհաննիսյան, ԴԱՆ, Արարատ, Արեւշատ, 2011, ասացող՝ Ռեբեկա Դիլբոյան, 1967 թ. ծնվ.:

¹³ Լ. Սիմոնյան, Կ. Հովհաննիսյան, Ն. Շամամյան, ԴԱՆ, Արագածոտն, Թալին-Մաստառա, 2015, ասացող՝ Հրանուշ Թադեոսյան, 1930 թ. ծնվ.:

¹⁴ Լ. Սիմոնյան, Կ. Հովհաննիսյան, ԴԱՆ, Արագածոտն, Թալին-Հացաշեն, 2015, ասացող՝ Տարոն Մարտիրոսյան, 1964 թ. ծնվ.: Այս ավանդությունը շատ յուրահատուկ է: Թվում է, թե խոսքը Քրիստոսի մասին է, սակայն բանասացը Նրա անունը չի տալիս, մյուս կողմից Քրիստոսի ծնունդը հունվարին է, ոչ թե սեպտեմբերին: Հացաշեն գյուղում Թուխ Մանուկի տոնն ունի յոթ օրվա շարժականություն: Ճիշտը սա է համարվում, թեև Հացաշենում Թուխ Մանուկի մասին երկու ավանդություն էլ կա՝ ըստ հոգեւորականի՝ Թուխ Մանուկը քրիստոնյա երեխա է եղել, ում տանջամահ են արել մահմեդականները, եւ հրեա մանուկ է եղել, ում առեւանգել են մահմեդականները:

¹⁵ Կապուտանի Թուխ Մանուկը ժայռ է, որի վրա մենհիր է կանգնած:

Ամեն տարի այդ օրը գալիս են եւ տոնում են երեխայի ծննդյան օրը, եւ այդ օրվանից այս սրբավայրը կոչվում է Թուխ Մանուկ»¹⁶:

Պարոնի Թուխ Մանուկ. «Ասում են. եղել են որը երեխաներ՝ քույր ու եղբայր, որոնց սպանել են այդտեղ: Անմեղ երեխաների վրա երկնքից լույս է իջել եւ այդ վայրում եկեղեցի են կառուցել»¹⁷:

Արևշատի Թուխ Մանուկ-Կուս Վառվառ. Սրբավայրը ժամանակին հին շենքի միջանցքում է եղել¹⁸, շենքը քանդելիս դրան ձեռք էին տվել: Համարվում է, որ այն կառուցել է Հովհաննես Դրասխանակերտցի կաթողիկոսը¹⁹: «Իրենք երեք քույրեր են, մեկը սա՝ Կուս Վառվառ, մյուս երկուսը՝ Հռիփսիմեի եւ Գայանեի սրբավայրերը, հեռու են գտնվում՝ գյուղի դաշտերում: Սովետի ժամանակ հրաման է եղել մաքրել տրակտորով, բայց երբ տրակտորը մոտեցել է, մի ահագին օձ է դուրս եկել, եւ տրակտորիստը հրաժարվել է քանդել սրբավայրը»²⁰:

Վարդենիկի Թուխ Մանուկ. «Մի ժամանակ գյուղում օտարական սեւուկ, թուխ տղա է եղել, ով շատ է աղոթել, ամբողջ օրը մատուռից դուրս չի եկել, հետեւել է մաքրությանը: Երբ նա մահացել է, իր թխության պատճառով սրբավայրն անվանել են Թուխ Մանուկ: Մեջի տապանաքարը իր գերեզմանն է»²¹:

Որոշ Թուխ Մանուկներ կապված են ազգային հերոսների հետ²²:

Լիճքի Հոխիկյանների Թուխ Մանուկ. «Երբ թուրքերը հարձակվում են ու ներխուժում գյուղ, մի տղա երեխա, որ ձեռքին խաչանշան ուներ, թաքնվում է մատուռի ետեւում: Թուրքերը գտնում են նրան, սուրը քաշում են, որ սպանեն, վրա է հասնում Զորավար Անդրանիկը, կոտորում է թուրքերին, տղային նստեցնում է իր ձիուն եւ տալիս է նրան երեք բանալի»²³:

¹⁶ Ռեժիսոր Խաննե Պողոսյանի ձայնագրություններից, Կոտայք, Կապուտան, 2015:

¹⁷ Պարոնի Թուխ Մանուկը գտնվում է մեծ եկեղեցու տարածքում, որից միայն հիմքն է մնացել: Լ. Սիմոնյան, ԴԱՆ, Կոտայք, Պարոնի, 2013, ասացող՝ Ավարդ Դարյան, 1945 թ. ծնվ.:

¹⁸ Հիմա սրբավայրը գտնվում է գյուղի փողոցներից մեկում, իսկ տունն ավելի խորքն է ընկած:

¹⁹ Իրականում այս Թուխ Մանուկը գետաքարերից բաղկացած աշտարակաձև մի քարակոյտ է:

²⁰ Լ. Սիմոնյան, Կ. Հովհաննիսյան, ԴԱՆ, Արևշատ, ասացող՝ Պարգե Գրիգորյան, 1931 թ. ծնվ.:

²¹ Լ. Սիմոնյան, Կ. Հովհաննիսյան, ԴԱՆ, Գեղարքունիք, Վարդենիկ, 2013, ասացող՝ Հասմիկ Սահակյան, 1994 թ. ծնվ.:

²² Գեղիեգուգանի Թուխ Մանուկը կամարակապ եկեղեցի էր, որին կից հերոսների պանթեոն էր, ուր թաղված էին որոշ հայդուկապետներ՝ Աղբյուր Սերոբ, Հրայր Դժոխք, Իշխան Պետոս եւ այլք: Տե՛ս. Վ. Պետոյան, Սասունի ազգագրությունը, Երևան, 2014, էջ 11:

²³ Լ. Սիմոնյան, Կ. Հովհաննիսյան, ԴԱՆ, Գեղարքունիք, Լիճք, 2013:

Գեղիովիյրի Թուխ Մանուկ. «Գարեգին Նժդեհի զինվորներին մեկը անցել է այստեղով դեպի Զանգեզուր՝ պատերազմելու թուրքերի դեմ, աղոթք է արել Թուխ Մանուկին, եւ 300 հայ զինվորներով հաղթել են 700 թուրք զինվորներին: Դեպքից հետո երեխա է ծնվել, եւ ի պատիվ հաղթանակի՝ անունը դրել են Մանուկ»²⁴:

Մի քանի Թուխ Մանուկների դեպքում ավանդույթունը պատմում է, թե ով է եղել Թուխ Մանուկը, եւ ինչպես է առաջացել սրբավայրը:

Գալատի Կարմիրգյուղի Թուխ Մանուկ. «Ափեր Սմբոն բացատրում է, որ Միչինքը²⁵ հնարել են 40 մանուկները, որոնք ընկերներ էին: Նրանց մեջ հարց է ծագել, արդյոք ո՞վ պետք է ղեկավարի խումբը: Տեսել են, որ համաձայնություն չեն գալիս, մեծ հաց են թխել, մեջը դրամ են դրել: Բաժանելուց հետո ում ընկել է դրամը, նա էլ դարձել է խմբի ղեկավարը: Այդ մանուկներից ամենախելոքը եղել է թխադեմ մի մանուկ: Նախանձոտ հոգեւորականները մանուկին սպանել են: Հետագայում, ի պատիվ այդ մանուկների, կառուցել են «Թուխ Մանուկ» անունով շատ մատուռներ: Նզո՛վք այդ նախանձոտ մանկասպաններին: Հետո Ափեր Սմբոն բացատրում է, որ քառսունքը Քրիստոսի ո՛չ մահվան, ո՛չ էլ ծննդյան քառսուն օրերն են, այլ այն ժողովուրդն ընդունել է ի պատիվ քառսուն մանուկների, որոնք պայքարել են հոգեւորականների շնույթյան եւ կեղծիքների դեմ: Այդ պատճառով էլ հենց նրանցից ամենաազգի ընկնողին սպանել են, բայց ժողովուրդը նրանց հիշատակը չի մոռացել: Դարեր են անցել եւ մանուկները մոռացություն են տրվել: Այդ տոնը կոչվում է նաեւ «Լիճք»²⁶. լճացել է մանուկների արյունը, բողոքել, բայց, միեւնոյն է, մոռացվել է»²⁷:

Այս ավանդույթյան երկրորդ տարբերակը՝ քիչ այլ մանրամասներով.

²⁴ Լ. Միմոնյան, Կ. Հովհաննիսյան, ԴԱՆ, Գեղարքունիք, Գեղիովիտ, 2013, ասացող՝ Կիրով Մովսիսյան, 1939 թ. ծնվ.: Այս Թուխ Մանուկն այժմ եկեղեցի է, խորանում մեծ խաչքար է կանգնած, որը ջարդված է եղել մեջտեղից, հետո շաղախով միացվել, այն կոչվում է Սպայի խաչքար՝ Գարեգին Նժդեհի պատվին, տե՛ս. Կ. Հովհաննիսյան, Գեղարքունիք. մի քանի Թուխ Մանուկ սրբավայրերի մասին, ԱՖՏ, Թ., Երևան, 2014, էջ 211:

²⁵ Միջինքը խորհրդանշում էր Մեծ պատի կիսվելու՝ 24-րդ օրը: Միջինք կամ միջնակյուն է անվանվում նաեւ ծխական բաղարջը, որ կիսում են այդ օրը երեկոյան: Տե՛ս Ս. Մկրտչյան, Տոներ, Երևան, 2010, էջ 62:

²⁶ Ալնիսայտ է, որ այստեղ խոսքը Սեբաստիայի Քառսուն Մանկուքի մասին չէ, սակայն որոշակի շփոթ կա. «Լիճք» ծեսը կապված է Սեբաստիայի մանուկ-նահատակների հետ: Լիճքի տոնը ընկնում էր Միջինքի շաբաթի չորեքշաբթի օրը: Տե՛ս. Ս. Մկրտչյան, նշվ. աշխ., էջ 63:

²⁷ Գ. Ստեփանյան, Մեան-Գեղարքունիք, ՀԱԻ արխիվ, ֆոնդ 125, թղթ. 257, թ. 36-37, բանասաց՝ Սմբատ Ասատրյան, 1886 թ. ծնվ.:

«Մի վանքին կից կար դպրոց, ուր պատանիներ էին սովորում, թվով 40 հոգի: Մի օր պատանիները տեսնում են, որ մի քանի վարդապետ ու քահանա կույսերի հետ շնոթյուն են անում: Կույսերն ու վարդապետները որոշում են քնած ժամանակ բոլոր պատանիներին սպանեն, որպեսզի շնոթյան լուրը չտարածվի: Այդպես էլ անում են: Սկսվում է կոտորածը, բայց այդ ժամանակ մի թխադեմ մանուկի հաջողվում է փախչել եւ թաքնվել: Ազատվելով, նա այդ մասին չի պատմում, քանի որ իրեն էլ մահապատժի կենթարկեն՝ որպես զրպարտողի: Այս մանուկը, հեռանալով այլ վայրեր, պատմում է եղելությունը: Ի հիշատակ մանուկների այդ կոտորածի՝ մատուռներ են կառուցում ու անվանում Թուխ Մանուկ: Շատ տարիներ հետո բոլոր Թուխ մանուկները դասվում են սրբերի շարքը»²⁸ եւ պաշտվում ժողովրդի կողմից»²⁹:

Մեղրաձորի Թուխ Մանուկ (Թեժառույթ). Կա երկու ավանդազրույց: Առաջինն այս է.

«Թուխ Մանուկ Վանկի անունն է, հույն ժողովուրդ է սարկողն էլ»³⁰: Իրանծ ադատի կայդի³¹ անուն են դրրած: Ըդոնկ քուր ու ախպեր են, քըվօր անունը Թուխիդ, ախպոր անունը՝ Մանուկ, ըդոնկ էլ շադ բարի, սըռպատան³² մարտ: Ըդու հըմար էլ, վանկի անունը դրրած Թուխ Մանուկ»³³:

Ահա երկրորդ ավանդազրույցը.

«Մեր վանկի անունը, ախպոր անունը Մանուկ է, քըվօր անունը մըդես գածեր է: Քուր ու ախպեր ջհուդի էրեխեկ են ըդոնկ: Գիդես ինճի՞ հըմար է էդ անունը: Էրգու քուր են էլած, մէ ախպեր: Գնածած են առդերը պայելու հին ժամանագ: Հերն ասէ, ջըհուդը, ասէ գածեկ, վօր կըչերը չուդեն, սաղ ցորեններն ուղըմ են, մընըմ միննագ քոկերը: Դէ, անհավաղ ժողովուրդ են: Էդ իրեկով նըստըմ են, էն քուրն ասըմ է ախպորը. «Ախպե՛ր, արէ տանկ էս Դիվերի Կարըղին»³⁴ պայ, էտանկ, թո ծըդերը էտան

²⁸ Իրականում քրիստոնեական սրբերի շարքում Թուխ Մանուկ չկա, այստեղ էլ շեշտվում է ժողովրդի կողմից պաշտվելու հանգամանքը:

²⁹ Գ. Ստեփանյան, նշվ. աշխ., թղթ. 126, թ. 25-26, Կարմիր գյուղ, բանասաց՝ Սմբատ Ասատրյան:

³⁰ Մեղրաձորում Թուխ Մանուկ են անվանում հայտնի Թեժառույթ վանքը, որ կառուցել է Իվան Երկայնաբազուկը 1196-1199 թթ.: Այն քաղկեդոնիկ եկեղեցի է, դրա համար էլ ավանդազրույցում ասվում է, որ այն կառուցել են հույները:

³¹ Իմա՛ սովորության համաձայն:

³² Իմա՛ սրբազան, սուրբ:

³³ Գ. Հակոբյան ԴԱՆ, Կոտայք, Մեղրաձոր, 2011, ասացող՝ Արաքսի Եփրեմյան, 1929 թ. ծնվ.: Բարբառային բառերի թարգմանությունն՝ ըստ բանահավաքի:

³⁴ Իմա՛ Աստծո տուն:

յան»։ Ասում է, հեղբուքին վոր ասեր է, ինձ որ կառուց³⁵, կեչխագ³⁶ բան կար, հեղառդի մըծիծ ըմմեն քաշված են, էլ մէ հադ չէ մընածէ։ Հա նըստած, նըստած, տեյած գածեր են, ասած են. «Տես, Կարոտը³⁷ հեռածըրեծ»։ Էտըմ են տուընը, հերն ասըմ. «Հըմի առդը կերան»։ Ախճիգը վեռծընըմ ասըմ է. «Հե՛ր, տվեր ենկ էս Դիվերի Կարրդին պայ, առդի վըրնիծ կըշերն ըմմեն փախան, մեր առդին էլ չըկան»։ Հերն առնըմ հոշարին³⁸, ընգընըմ ճըթերու էդեվը³⁹։ Ախճըգներիծ մեգը էտըմ, Ծաղգավանկ են ասըմ, մեգին ընդե է բըռտըմ, մեգին էլ վանկի ծառի տըգին տըղին է մոռտըմ, վանկի մըծին էլ ախճըգանն է մոռտըմ։ Գիշերը Ասծու հըրամանկով բօծը էրգինկ է ըլնըմ։ Ըդե վանկ չէ ըլնըմ, էդ բօծը ըլնըմ երգինկն ու իճընըմ է, ըդե Աստու հըրամանկով տեռդերները տեսնըմ են, ասըմ են. «Ժամին, էս սարին ճըկնավօր կա»։ Առեճ էտըմ ին սարերին ճըկնըմ ին ջայեղները, վօր ըլներին սուռալ։ Ասեր են ըդէ ճըկնավօր կա։ Գածած տեսած ի՞նձ ճըկնավօր, էրգու հադ բըռտուգ մառտ կա, մեգն ախճիգ, մեգը՝ տըղա։ Ասըմ են տեռդերները. «Տեր, քեզի այան⁴⁰ է, ըսենձ բան է»։ Մեգն էլ Ծաղգավանկ է ըլնըմ, հիմի էտըմ են ընդեղ, մեր վանկի քուըն է։ Ըդե բերըմ են ալբալը⁴¹ թապըմ են, վանկը կաբըմ են, ըդու վըրեն վանկ են սարկըմ, գերեգմանօծ են սարկըմ։ Վանկի ծառըն էլ հիմի տանձի ծառն է, ըդու բոլորն էլ սարկած, հասարապաղած, էդ էլ վանկի ախպերն է։ Միշտ ինկըն էլ մուրազատուր վանկ է։ Էդոնկ ջհուդի ախճիգ են, տղա - ախճիգ են։ Ըդենձ

³⁵ Իմա՛ ագոսալ։

³⁶ Իմա՛ կաշաղակ։

³⁷ Իմա՛ աստված։

³⁸ Իմա՛ թուր ու թվանք, սպառազեն, տվյալ դեպքում՝ սուր։

³⁹ Մինչ այս մասը՝ ավանդությունը գրեթե բառացիորեն կրկնում է «Մասնա Ծոներ» էպոսի տարբերակներից մեկի սկզբի հատվածը։ Մի կուսպաշտ թագավոր երկու որդի է ունենում՝ Մանասար եւ Ասլիմելիք։ Դրանց արտերը թոչուններն ուտում էին, քանի որ կուսպաշտ էին։ Մի օր հայրը նրանց ուղարկեց՝ արտերը թոչուններից պահպանելու։ Մանասար նայեց վերեւ ու ասաց. - Մեր հայրը կուռք է պաշտում, բա էս «վերի դեխինն» ինչ է։ Կա չկա, սա Աստվածն է։ Անպայման մենք պիտի հավատանք Աստծուն։ Հենց հավատաց, թոչուններն այլեւս արտերը չվնասեցին։ Նրանք տուն գնացին, երբ հայրն իմացավ, որ թոչուններն էլ արտերը չեն վնասում, հասկացավ, որ նրանք հավատացել են «վերին դեխի» Աստծուն ու այդ մեղքի համար պետք է կուռքին մատաղվեն։ Մոր խորհրդով եղբայրները փախչում են տանից։ Տեն Մասնա Ծոներ, Երեւան, 1977, էջ 251-253, Ե. պատում, պատմող՝ մարտունեցի Հովհաննես Հակոբյան, գրառող՝ Ս. Հարությունյան։

⁴⁰ Իմա՛ քեզ հայտնի լինի։

⁴¹ Իմա՛ իսկույն։ Խոսքը շինանյութի մասին է։

Աստուծոյ դիմած, ասած, առտեն ըստոնկ դառնան հայ: Ըստոնկ կըրոնը փոխին, հավաղածին, կըրոնը փոխեծին, էլ չեն կառնա ըստոնծ վըրեն»⁴²:

Որոշ Թուխ Մանուկներ ղեպքում ավանդուկթյան մեջ արտացոլվում է դրա պաշտպանական գործառույթը:

Վարդենիսի Թուխ Մանուկ. «Երբ Թուրքերը արշավում են Հայաստան, Վարդենիսի հայերը փախուստի են դիմում. Թուրքերը պաշարում են քաղաքը: Թուխ Մանուկը պատ է ստեղծում քաղաքի շուրջ, կասեցնում է Թուրքերին, եւ հայերը փրկվում են: Այդ օրվանից դառնում է ուխտատեղի»⁴³:

«1918 թ. ադրբեջանցիները հարձակվում են Վարդենիսի վրա, պաշարում քաղաքը: Թուխ Մանուկը բուք ու բորան է բարձրացնում եւ փրկում հայերին»⁴⁴:

Որոշ ավանդուկթյուններում շեշտվում է Թուխ Մանուկի տված գորուծյունը:

Մասրաբայի Թուխ Մանուկ. «Մի երկու հարյուր տարի առաջ գյուղում մի թամբալ տղա էր ապրում: Տանը ոչինչ չէր անում, հայրը զայրանալով վռնդում է նրան տանից: Տղան փախչում, գալիս է Թուխ Մանուկ, այնտեղ էլ քնում է գիշերը: Երազում ինչ-որ ուժեր նրան 7 փաթ շղթա են կապում, նա տրտնջում է, թե՝ «Շղթաները նեղում են»: Խղճում, թողնում են մեկ փաթը: Տղան լարում է ուժերը, ձիգ է տալիս՝ շղթան փրկվում է: Առավոտյան արթնանում, գնում է գոմ, անասունի մոտ, ուզում է կովի տեղը փոխել, ձեռքը մխրձվում է կովի մարմնի մեջ. սուրբը հսկայական ուժ էր տվել տղային: Մի օր հզոր մի փահլեւան է գալիս գյուղ, որ մրցի նրա հետ, եւ հյուրընկալվում է նրա տանը: Գիշերն Ավոն զարթնում, բարձրացնում է տան քարե սյունը եւ փահլեւանի չարուխը դնում է սյան տակ: Փահլեւանը առավոտյան արթնանում է, փնտրելով չարուխը՝ չի գտնում: Նայում, տեսնում է սյան տակ է դրած, վախեցած գոռում է. «Էսիկ ծուռ է», ու փախչում, գնում է: Այդ օրվանից տղայի անունը մնում է Ծուռ Ավո: Իրենց տոհմը չարունակում է ապրել գյուղում, եւ էդ տոհմում դեռ կա Ծուռ Ավոյի ուժը»⁴⁵:

⁴² Գ. Հակոբյան, ԴԱՆ, Կոտայք, Մեղրաձոր, 2013, ասացող՝ Շուշան Վիրաբյան, 1928 թ. ծնվ.:

⁴³ Ն. Շամամյան, ԴԱՆ, Գեղարքունիք, Վարդենիս, 2012, ասացող՝ Անահիտ Կարապետյան, 1955 թ. ծնվ.:

⁴⁴ Նույն տեղում, ասացող՝ Ասպրամ Շեղյան, 1970 թ. ծնվ.:

⁴⁵ Լ. Միսնյան, Կ. Հովհաննիսյան, Ն. Շամամյան, ԴԱՆ, Արագածոտնի մարզ, Թալին-Մաստարա, 2015, ասացող՝ Հրանուշ Թադևոսյան, 1930 թ. ծնվ.:

Երգեր

Թուխ Մանուկների մասին հյուսվում էին ժողովրդական եւ աշուղական երգեր, որոնք ծխական, մի քանիսն էլ՝ սիրային բնույթի են: Ծխական երգերը երգվում էին հենց Թուխ Մանուկ սրբավայրերում:

Պաշտամունքի եւ ուխտագնացությունների մասնակիցները հասարակության բոլոր շերտերն են՝ ամբողջ համայնքը: Շատ դեպքերում, հատկապես բազմամարդ ուխտագնացության ժամանակ, կազմակերպվում էին զանազան մրցություններ, երգ ու պար: Աշուղները, որոնք իրենց շնորհի համար պարտական են Մշո սուլթան Սուրբ Կարապետին, մտնելով ամեն քաղաք, գյուղ եւ բնակավայր՝ գովերգում են սրբին: Այդ երգերի մեջ երբեմն հիշատակվում է Թուխ Մանուկը, օրինակ.

Սուրբ Կարապետ բարձր բոլոր
Քե ճամբըխներ օլոր մոլոր.
Շատ ուխտաւոր քե դուռ կիզայ,
Շատ ուխտաւոր՝ որ ոտաւոր,
Որ ձիաւոր, պոշ ձիաւոր:
Սուրբ Կարապետ եմ գնացեր,
Պառկուկ եմ, մէջն եմ քնացեր,
Սէրս եմ առեր, չեմ իմացեր,
Ումուտատուր սուրբ Կարապետ:

Ինն աչերու լուսադիւրներ
Կաթ կու կաթեն լոյս լոյս ջրեր,
Ուռին բարտին շուք են եղեր,
Սիրականիս շնորհք են տրուեր:
Ի հոն դնեմ գլխիկս քարին,
Հոգիս ի տամ Թուխ մանուկին.
Ի հոն քնեմ սուրբ Կարապետ,
Ումուտատուր սուրբ Կարապետ⁴⁶:

Հաջորդ երգը նույնպես ժողովրդական-աշուղական ստեղծագործություն է՝ նվիրված Ս. Կարապետ վանքին:

Սուրբ Կարապետ

Դու աղա ես, դու փաշա ես.
Էմեն սրբոց դու գլխաւոր ես,
Մաքուր քեաւոր սուրբ Կարապետ:

ավանդագրույցը: Խսա գյուղացի Մանուկը մեծ ուժ ուներ, ամեն Վարդավառին բազմության առաջ երկու-երեք ձիու նալ կամ սամախտո էր կոտրում: Իր ստացած ուժի մասին պատմում էր. Վարդավառի ուխտի ժամանակ քնում է վանքում եւ երագում մի սենյակ է տեսնում: Մի կողմում կծով արյուն, մյուս կողմում՝ թարախ, դրանց միջեւ մի մարդ: Սա վերցնում է գութանի շղթան եւ կապում Մանուկի ոտները, բոյ մեջ էլ իրար խառնած մեկ բոտ ցորեն ու կորեկ է լցնում: Հրամայում է իրարից զատել ցորենն ու կորեկը, հետո շղթայում է նաեւ նրա ձեռքերն ու հրամայում. «Թողվե՛ն»: Մանուկը կատարում է հրամանը, շղթան փշրում է, արթնանում է փշրվելու ձայնից եւ այդ օրվանից հզոր ուժի տեր է դառնում: Տես. Կ. Մկրտչյան Մշեցի, Տարօս, Արարատ, 1881, թ. 5, էջ 234:

⁴⁶ Վ. Տէր-Սինասեան, Անգիր դպրութիւն եւ հին սովորոյթներ, հ. Բ., Կ. Պոլիս, 1904, էջ 39-40:

Քե շինած կամար-կամար.
 Լուսն էր դադրած չոր ազմար՝
 Քրիստոսի խաթրի խամար:
 Քեո լուսամուտ խրտ աւազան.
 Ոսկի բոռ, ոսկի գաւազան.
 Թուխ մանուկ⁴⁷ առջեւ գանազան:
 Քե շինած է մէջ պրակին,
 Քեո տօնն է կանանց կիրակին,
 Դարտին դարման սուրբ Կարապետ:
 Քեո ճամբը խրներ օլոր-մոլոր,
 Քեո դուռ կիզէր շատ ըխտաւոր.
 Ձիաւորին ոսկի խնձոր,
 Պայաւորին մուրատատուր սուրբ Կարապետ:
 Դեօ նստիմ քե գովամ,
 Չարքեր բոնեց, մկեց գնտան.
 Մէկ թօփալ կեօնդիկ կէր.
 Ասաց. - Քե կեղնիմ մուխրախան,
 Տանեմ թափեմ Փրո Պաթման,
 Չուր Քրիստոս գայ դատաստան⁴⁸:

Մեկ այլ երգի հեղինակ է համարվում Անպոչ-ճգնավորը⁴⁹, ով Սուրբ Կարապետի սիրելի աշուղն էր. նրա երգերը նույնպես երգվում էին մայրականքերի, Թուխ Մանուկ սրբավայրերի եւ լուսաղբյուրների մոտ:

Մանուկն եւ ջուրն

Այդ վայրի լեռներէն ի վայր
 Ջուրն է շինիդ անցանի, ա՛յ.
 Թուխ մանուկ մի դուրս էլեր,
 Ձեռքն ու զերես է լուացեր.
 Դարձեր ի ջուրն՝ հարցունք աներ, ա՛յ,
 «Ջուր դու, ի յո՞ր լեռնէն կուգաս,
 Իմ պաղիկ ջրիկ ու անուշիկ, ա՛յ»:
 - Ես այն լեռնէ կուգամ,
 Որ հին ու նոր ձինն ի վերայ ա՛յ:
 «Ջուր դու, ի յո՞ր առու կ'երթաս,
 Իմ պաղիկ ջրիկ ու անուշիկ, ա՛յ»:
 - Ես այն առուն կ'երթամ,

⁴⁷ Հավանաբար այստեղ Թուխ Մանուկը Քրիստոս է, քանի որ այս երգում կապվում է մկրտության ավագանի հետ եւ կանգնած է սրբի առաջ:

⁴⁸ Ս. Հայկունի, Ժողովրդական երգ, առած, հանելուկ եւ այլն, ԷԱԺ, թ. Զ., 1906, էջ 17-18:

⁴⁹ Անպոչ-ճգնավորը Ս. Կարապետ վանքի առասպելական սպասավորն է, լավ երգիչ եւ աշուղ՝ շնորհը ստացած Ս. Կարապետից:

Ուր փունջն շատ է մանուշակին ա՛յ:
 «Ջուր դու, ի յո՞ր այգի կ'երթաս,
 Իմ պաղիկ ջրիկ ու անուշիկ, ա՛յ»:
 - Ես այն այգի կ'երթամ,
 Որ տէրն ի մէջն է այգեպան ա՛յ:
 «Ջուր դու, ի ու՞ր տունկ կը ջրես,
 Իմ պաղիկ ջրիկ ու անուշիկ, ա՛յ»:
 - Ես այն տունկըն ջրեմ,
 Որ տակըն խոտ բերէ գառին,
 Ծառըն խնձորի, հազա-վարդին ա՛յ:
 «Ջուր դու, ի յո՞ր պաղչա կ'երթաս,
 Իմ պաղիկ ջրիկ ու անուշիկ, ա՛յ»:
 - Ես այն պաղչա կ'երթամ,
 Ուր պուպուլին քաղցր եղանակ ա՛յ:
 «Ջուր դու, ի յո՞ր աղբիւր կ'երթաս,
 Իմ պաղիկ ջրիկ ու անուշիկ, ա՛յ»:
 - Ես այն աղբիւր կ'երթամ,
 Որ գայ քո եարն ու ջուր խմէ.
 Դեմ գամ, ըզդունչըն պագնեմ,
 Ապա սիրովն յագնեամ⁵⁰:

*Հետեւյալ երգը նույնպէս երգել են Թուրք Մանուկ սրբավայրերի,
 Լուսաղբյուրների եւ Խաչաղբյուրների ուխտին՝ Հատկապէս Խաչվերա-
 ցի ժամանակ.*

Խաչ աղբրրիկ, Խաչ աղբրրիկ,
 Ի՞նչ անուշ է քե պաղ ջրիկ.
 Աջ կողմիդ է ջրջրիկ⁵¹,
 Ձախ կողմիդ է ջլվլիկ:

Խաչ աղբրրիկ կիգայ կաթ կաթ,
 Հոն լոգնողը կ'եղնայ երկաթ:

Խաչ աղբրրկայ ջուրն անուշ է,
 Հատ մի արախ սիրտէս կուգէ:
 Ուխտաւորներ, ուխտաւորներ,
 Եկէ՛ք տեսէ՛ք սուրբ խաչքարեր.
 Թուխ մանուկ խաչ հոն է կայներ,
 Սուրբ ծառին տակ լուսն է ցեթեր:

⁵⁰ Ռ. Պատկանեան, Ազգային երգարան հայոց, Ս. Պետերբուրգ, 1856, էջ 15-16: Վ. Տէր-Մինասեան, նշվ. աշխ., էջ 42-43:

⁵¹ Ջրի ակներ, որոնք ձախից եւ աջից հոսելով, յուրօրինակ խաչեր կազմելով՝ միանում են Խաչաղբյուրի կամ Լուսաղբյուրի գոին:

Սուրբ Թուխ մանուկ խաչն է օրհներ.
 Խաչ աղբրակայ ջուրն ու քարեր,
 Լոյսն է ցեթեր մէջ աղբրին
 Կամար կեապեր վերել գլխին:

Մեռնիմ քրզի Թուխ մանուկ Խաչ,
 Դուրպան եղնիմ դրանդ առաջ:

Քրիստոս Աստուած, դու ողորմէ,
 Իմ ցաւերը դու քժշկէ.
 Սուրբ Թադէոս⁵², դու հիմ դիր,
 Թուխ մանուկ ժամ դու եիս շիներ⁵³:

Որոշ դեպքերում Թուխ Մանուկը կարող է լինել սիրահարի հովանավոր-օգնականը.

...Արի էրթանք դըլս կանանչ արտ,
 Քրզի նաղ էնիմ սրտիս դարտ.
 Ջիս մի թորկի ժամու դոներ,
 Մի կապի իմ ոտ ու ձեռներ:

Կանչիմ Թուխմանուկ Սուրբ Նշան,
 Էդ քու աչքերն է փերուշան.
 Ջառ ու զարբար շորեր քե տամ,
 Խաքի-կապե, գնա դըլս ժամ:

Կարուկ է քու շապկի յախեն,
 Աստված թըլս իգա ձըր հախեն.
 Չըք թորկի օր մարդ մի ընցնի,
 Ձըր չօլկերան տան սոխըխեն⁵⁴:

Թուխ Մանուկ սրբավայրերն ունեն նաեւ զանազան փորձանքներից պահպանիչ գործառույթներ եւ որոշ երգերում հիշատակվում են որպէս հմայական պաշտպաններ: Կիտուռի (մորեխ) դեմ երգերում նույնպէս հիշատակվում է Թուխ Մանուկ սրբավայրը: Կիտուռը հարձակվել է կո-

⁵² Հիշվում է այն սուրբը, ում անունով մոտակա մայրավանքն է: Քանի որ սրբավայրի կառուցողը համարվում է Ս. Թադէոսը, հնարավոր է, որ այս սրբավայրը գտնվում էր Մակուի հանրահայտ Ս. Թադէոս վանքի շրջանում:

⁵³ Վ. Տէր-Մինասեան, նշվ. աշխ., էջ 160-161:

⁵⁴ Ա. Մխիթարյանցի ֆոնդ, Տաղեր եւ խաղեր, մաս Բ., ժողովրդական եւ աշուղական երգեր, «Լե, լե, յաման», ՀԱԻ արխիվ, էջ 596-597: Տղան սիրեցյալի՝ Գուլեի գովքն է անում եւ կանչում նրան իրար հետ ապրելու՝ Միփան սարեր ու Կոնկու սար: Բավականին մեծ սիրային երգ է, մեջբերվում է վերջին երեք քառյակը:

**րեկի դաշտերին, եւ գյուղացիները երգով կանչում են սրբերին ու Աստ-
ծուն, որ իրենց ազատի այդ արհավիրքից:**

Կիտուռի երգեր

... Կիտուռ գնաց Ուրթ աղբին⁵⁵,
Կտրեց գկորեկ թօրեկեց գուր պին⁵⁶,
Կօտ մի չեղաւ, տէնք սոխի գին:
Մէռիմ քըզի սըր Հընգրւան
Մատաղ կտրեմ վըր քո շէման,
Արի գկիտուռ մեր հողէն հան,
Հաց մի չեղաւ, բրդենք ի թան,
Ճժեր ուտեն, էրթին գուրթան:
Մեռնեմ քըզի սըր Թուխ-Մանուկ,
Ճուղ-ճուղ կորեկ թօրեկե կայնուկ.
Մեռնիմ քըզի սըր-Կարապետ,
Երկու տէր-տէր, մէկ վարդապետ,
Մատաղ կտրեմ Մարկոսի ճետ,
Ժողվա գկիտուռ, լից Մուրատ գետ...⁵⁷

... Անտէր թրթուր անաչք ու լուս,
Կորիկ նոր զականջ թալէ դուս,
Խըլպտի⁵⁸ կտրէ գկորիկի բուս:
Տո՛ տղայ Նորսո, գիօրիկ քէ,
Աչքերդ բանց թրթուրն իշէ,
Մեւ եզ յիլ տո՛ւր⁵⁹, գկարմիր քէ,
Մեռնիմ քըզի Թուխ-մանուկ,
Մատաղ էնուք, գքու հող տանունք⁶⁰,
Ճուղ ճուղ կորիկ թօրեկե կանուկ⁶¹:

Օրուի կիտուռ

Հա նայ, նար նայ, նիննայ նար նայ,
Հա նայ, նար նայ, նիննայ նար նայ,
Օրուի կիտուռ, օրուի կիտուռ,
Արի քու տուն, դրուի քու դուռ:
Արի քու տուն, դրուի քու դուռ,
գԱրբեն չենէր սէվտայիծուռ:
Կիտուռ գնաց ուր հետ թրթուռ

⁵⁵ Արտերի անուն է:

⁵⁶ Իմա՛ թեմի:

⁵⁷ Երգի շարունակության մեջ սրբերին կանչելն ու մատաղները չեն օգնում, դիմում են Աստծուն, ով ուղարկում է կարմրալանջ սարյակներին (գրո գուռ), որոնք ուտում-վերացնում են կիտուռին: **Գ. ք. Նժդեհեանց**, Ալաշկերտի բանաստեղծական ժողովածու, ԱՀ, հ. Ե., Թիֆլիս, 1899, թ. 1, էջ 197-198: Սա բավականին մեծ երգ է, ուստի բերվում է միայն այն հատվածը, ուր հիշատակվում է Թուխ Մանուկը: Դատելով երգի բովանդակությունից՝ այն պետք է ծիսական լինի, թեև հեղինակն այն գետնեղել է երգիծական երգերի շարքում:

⁵⁸ Իմա՛ աշխատել:

⁵⁹ Իմա՛ ետ քշել:

⁶⁰ Այս դեպքում, փաստորեն, կիտուռի դեմ պայքարում օգնում է Թուխ Մանուկ սրբավայրի հողը, ինչն էլ տվյալ դեպքում փոխարինում է այլ վայրերից հայտնի Ս. Հակոբի աղբյուրի ջրին:

⁶¹ **Տ. Նավասարդեանց**, Հայ ժողովրդական հեքիաթներ, գ. 6, Թիֆլիս, 1890, էջ 69-70: Երգի ընդարձակ ծավալի պատճառով մեջբերվում է միայն վերջին մասը:

Հանչի դռներ վորցին զկիտուո՛
Կիտուր գնաց թրթռան հետ,
Անտրէ Մխոն մատղեց զուր ճետ:

Եա մեռնիմ քե, Սուրբ Թուխ-Մանուկ,
Իրեք արտուց քիլա մա տուր:

Եա մեռնիմ քե Սուրբ Էջմիածին,
Կիտուր իջաւ արեց զխաժին⁶²:

Առանձին տեղ է գրավոււմ Հետեւյալ երգը, որի կատարման մանրամասները վերաբերյալ տվյալներ ինձ հայտնի չեն.

Էլ են խոքին չկա մըչ ձեր,
Թուխ մանուկներ հայոց էրգրի,
Թուր ու կալխան⁶³ չկա մըչ ձեր,
Էլ դո՞ր ճժեր էրթան զելվին⁶⁴:

Մըչ ձէ դրին մեզ-մեզ խաչքար,
Ռանգ-ռանգ շուշպա, մոմ ու մոմկալ,
Տիրոջ մեղա խոսքիս խամար,
Իմա՛լ սովորին մեր ասք պախեն:

Հայրիկ⁶⁵ էգալ ուր աչք-հունք թաց,
Երես դառուց ասուց չեղած,
Ըսեց. «Հուր էր խայուն աստված,
Աստված անգութ ուժեղին էր»:

Ըսեց. «Ի՞նչ ա աստված ու խաչ,
Մանկանց կոչեք ի զեն, հառաչ,
Աշխար գլխուն կառի մեր աչ,
Խոսք ամեն տեղ ուժեղին ա»:

Թուխ մանուկներ խոքի առին,
Ժողվին ճիժ-պիժ, նման խնին,
Թրի լեզուն թըխ լավ սերդին,
Մեր փրգութեն մըչ ըզրան ա⁶⁶:

⁶² Տարօն, հավաքածոյ ժողովրդական երգերու, հ. Ա., հավաքեց եւ կազմեց՝ Ա. Տէր-Խաչատուրեանը, Պէյրութ, 1950, էջ 65-66:

⁶³ Իմա՛ վահան:

⁶⁴ Իմա՛ կուփվել, թրծվել:

⁶⁵ Խրիմյան Հայրիկ (Կաթողիկոս Մկրտիչ Ա. Վանեցի):

⁶⁶ Ալաշկերտ, Կագի գյուղ, ասացող՝ Կաքավ մայրիկ (106 տ.), ՀԱԻ արխիվ, «Պիոներ կանչ»-ի արխիվ, թղթ. 2, էջ 9:

Բանահյուսական փոքր ժանրի ստեղծագործություններ

Ըստ Վ. Տեր-Մինասյանի՝ *Խաղողօրհնեքին ու Ճրագաքաղին անդաստան են կատարում*: Շողակաթի ցերեկը հավաքվում են, գալիս է շուռ-ջառազգեստ քահանան՝ աջ ձեռքում մկրատ, իսկ ձախում՝ խաչ: Տիրացուները վառած մոմերով ու կանթեղներով երգում են. «Արեւելք գերարիին եւ օթարան լուսածին» շարականը եւ գնում են դրախտը⁶⁷, եթե վանք ունեն, իսկ եթե չունեն, գյուղի կամ քաղաքի երեցփոխանի այգին են գնում, ուր ճշտորեն կատարում են անդաստանի արարողությունը: Ապա դպրապետն ուժեղ ձայնում է. «Օրհնեա, Տէ՛ր»: Ժամարարը ձայնում է. «Օրհնեսցի ողկույզ... Այգւոյս այս նշանաւ սուրբ Խաչոյս եւ սուրբ Աւետարանաւս եւ առուրս շնորհիւ», հետո ժամարարը վերցնում է մկրատ կամ դանակ եւ կտրելով մի ողկույզ ու ցույց տալով ժողովրդին՝ բարեմաղթում է. «Երկնքի լոյս Թուխ մանուկներէն ցօղուած են այս մեր այգիներու ողկույզները. Աստուած օրհնեց մեր այգիները՝ Նոյի տապանով, Քրիստոսի սուրբ խաչով, Աստուածածնի արցունքով, Լուսավորչի լոյս հաւատքով.

Հաց ու գինի
Տէր կենդանի
Թէ մեր այգիներն ալ պիտի ըլլան միշտ դալար
եւ ողկույզներն ըլլան միշտ անսպառ»⁶⁸:

Վանի Այգեստան թաղամասի Թուխ Մանուկին վանեցի կանայք կիրակնամուտին միշտ ուխտ էին գնում, մոմ վառում, խունկ ծխում, նրա կանթեղի մեջ ձեթ լցնում: Եթե կանթեղի ձեթը պակասեր, մատուռի շուրջ լոյս էր փայլում, եւ դա տեսնելով՝ վանեցիներն շտապում էին ձեթ տանել սրբավայր: Թուխ Մանուկից երեխաների, հատկապես տղաների համար պաշտպանություն էին հայցում՝ աղոթելով. «Ով թուխ մօրուս Թուխ մանուկ, դու իմ մանուկը սիվտակ մօրուս անես, արեւ շատութիւն տուր իմ կտրիճին՝ իր խօր տան ճրագ էլնի, գայ քեզ հա ճրագ-լոյս պիրի, քո կիւրակնամուտ վառ պահի»⁶⁹:

Թուխ Մանուկը հզոր մուրազատուր սուրբ է: Նրան դիմում են շատ դեպքերում եւ նա միշտ օգնում է: Հաճախ նա հայտնվում է երազների եւ տեսիլքների միջոցով: Հեքիաթներից մեկում պատմվում է, որ թագա-

⁶⁷ Վանքերի պարտեզները կոչվում են դրախտ:

⁶⁸ Վ. Տեր-Մինասյան, նշվ. աշխ., էջ 156-157:

⁶⁹ Ե. Լալայան, Վասպուրական. Հասար, ԱՀ, հ. XXV, Թիֆլիս, էջ 54-55:

վորն ու թագուհին երեխա չունեին, օր ու գիշեր դրա մասին էին մտածում: Գիշերը թագուհին երազ է տեսնում:

«Գիշեր հալվոր մարդմե հրազ կիգա, ընտրա մորուք ճնից լե սպիտակ կեղնի, էրկեն⁷⁰, չոքեր կհասնի ու կընկան կըսե:

- Հողածին, հորի⁷¹ հմալ էրկեն-բարակ կմտածիս, կյանք տի սուգ ու լացով կընցուս, ես սուրբ Թուխ Մանուկն իմ, ընձնե մը վախենա, ես մուրազտի կիտամ:

Սաբախտան⁷¹ չուտ թագավորիդ ըսե, թըխ մարդ ճամփե Բինգուլի Սեր ախալից 7 իշաբեռ ջուր բերեն, կուժ մե դու ու մարդտի 7 օրվա մեջ կխմիք, օրեկան իրեք հեղ, մանցած ջրով դու ու մարդտի կլողկնաք ու ասու հրամանքով դու կերկուհոգովնաս, կընցնա 9 ամիս, 9 օր, 9 սհաթ, դու խորոտիկ տղեմե կբերիս»⁷²:

Այդպես էլ անում են, եւ նշված ժամանակին թագուհին մի տղա երեխա է ունենում:

Թուխ Մանուկ սրբավայրերում «Հայր մեր»-ից, այլ աղոթքներից, սրտի փափագից բացի, դիմում են հենց սրբին ուղղված փոքրիկ աղոթքներով, ուր շեշտվում է նրա՝ մուրազ կատարողի ուժը:

Թուխ Մանուկ ուխտ եմ գացեր,
Սրտիս դռներն եմ քացեր,
Մուրազ կուզեմ, մուրազ տուր,
Թուխ Մանուկ մուրազատուր⁷³:

Ահա մեկ այլ փոքրիկ աղոթք՝ ուղղված Թուխ Մանուկին.

Թուխ մանուկ, քո անուշ անվան մեռնեմ,
Իմ նպատակը կատարես, ես մատողով-շուշպով կգամ քո դուռ⁷⁴:

Որոշ Թուխ Մանուկ սրբավայրեր ունենում են իրենց հատուկ խնամողները, որոնք այդ գործառույթը ստանում են տեսիլքի կամ երազի

⁷⁰ Իմա՛ երկար:

⁷¹ Իմա՛ առավոտ:

⁷² Ս. Սողոմոնյան, Խելացի թագավորի մե պատմությունի հեքաթը, թղթ. 4, Կարնո նահանգ, Խնուս, էջ 234-244, ՀԱԻ արխիվ, Ե. Խաչատրյանի եւ Ս. Սողոմոնյանի ֆոնդ: Գրեթե բոլոր Թուխ Մանուկ սրբավայրերի մասին պատմվում են երազներ եւ տեսիլքներ, որոնց միջոցով էլ մարդիկ հաղորդակցվում են սրբի հետ: Թուխ Մանուկների կերպարը բացահայտելու համար երազներն ու տեսիլքներն ունեն գերակա նշանակություն: Սույն աշխատանքում երազներն ու տեսիլքներն չեն ընդգրկվել, քանի որ դրանք այլ աշխատանքի նյութ են, այս մեկը գետեղվել է, քանի որ այն հեքիաթից է:

⁷³ Ե. Մելիքեան, Հարք-Խնուս, Անթիլիաս, 1956, էջ 369:

⁷⁴ Լ. Սիմոնյան, Կ. Հովհաննիսյան, ԴԱՆ, Գեղիովիտ, ասացող՝ Կիրով Մովսիսյան, 1939 թ. ծավ.:

միջոցով: Ժողովուրդը այդ խնամողներին հիմնականում անվանում է «Թուխ Մանուկի տեր»: Այդպիսի խնամողներից մեկի աղոթքը հետեւյալն է.

Թուխ Մանուկ ջան, քո շունն իմ, քո ծառան իմ, քո դեմ կհաչամ:

Դու պահապան բոլորին:

Դու պաշտպան պանդուխտներին:

Դու պաշտպան օտարականներին:

Դու պահապան զինվորներին⁷⁵:

Հաջորդը նույնպես Թուխ Մանուկի խնամողի աղոթքն է՝ ուղղված Չամուղու-Քուչակի Թուխ Մանուկ-Ս. Կարապետին.

Զորավոր զորքիդ մեռնիմ,

Քո մարմար քարերիդ մեռնիմ,

Թուխ Մանուկ ջան:

Հեռու տեղից էլ կգամ՝

Մարմար քարերիդ մեռնիմ:

[Հայր մեր ...]

Խաչ հայրական, Խաչ,

Տասերկու շաբաթ շաբական,

Չարոցի մաշ, չարխափան՝

Քրիստոս կայնեց պահապան:

Ողջույն քեզ Մայրամ,

Օրշնյալ ես ի Քրիստոսին,

Ամենագորավորին,

Հանուն Հոր, եւ Որդու,

Եւ Հոգուն Սրբո, Ամեն:

Փառքդ շատ ըլլի, Աստված իմ,

Փառք քո գործության:

Դու պաշտպան կայնիս ախշարին,

Հայ քրիստոնյային՝

Զորություն թափիս վըրնեք⁷⁶:

Բացի Թուխ Մանուկ սրբավայրերից, գոյություն ունեն նաեւ Թուխ Մանուկ կոչված Ավետարաններ: Դրանցից մեկի հիշատակարանում, որ գրված է հետագայում, կան երեք ձոն-աղոթքներ՝ նվիրված այդ Թուխ Մանուկ Ավետարանին⁷⁷:

⁷⁵ ԴԱՆ, Մաստարա, ասացող՝ Հրանտշ Թադևոսյան, 1930 թ. ծնվ.:

⁷⁶ Ռեմիտոր Խանն Պողոսյանի ձայնագրություններից, Արագածոտն, Քուչակ, 2015:

⁷⁷ Այդ Ավետարանը, որ կոչվում է Թուխ Մանուկի, ըստ գրչության արվեստի եւ ոճի՝ թվագրվում է ԺԵ.-ԺԶ. դարերով, տե՛ս Յուզակ Մայր Աթոռ Ս. Էջմիածնի նոր ստացված

1. Սուրբ Թուխ Մանուկ
 (Յ)ուսացելոց Աւետարան
 Ուխտաւորաց բըժըշկարան
 Ամեն կողմից դէպ քեզ կուգան
 Մուրադ առաց յետ կը դառնան:
 Ուխտաւորաց բժիշկ ես դու
 Դիւահարաց սրփիջ ես դու
 Անգեալներոց կանքնիչ ես դու
 Քեզ եմ դիմում Սուրբ Թուխ Մանուկ
 Ուխտաւորաց ես դու նեցուկ:
 Շատ փափակով քեզ դիմում եմ
 Սո(ւ)րբ անո(ւ)նդ միշտ յիշում եմ
 Ես Սարգիսս մեղաւոր եմ
 Բայց փափակով քեզ յիշում եմ
 Աւետարան Սուրբ Թո(ւ)խ Մանուկ⁷⁸:

2. Ով Սուրբ Աւետարան Թուխ Մանուկ,
 Ծառայ եմ քեզ եւ ստրուկ,
 Ունիմ կարիք, ցաւեր յատուկ,
 Հրաման փրկելու շնորհէ կտրուկ:
 Եկել եմ մօտդ ուխտելու,
 Խորունկ ցաւերս լալու
 Ձիրք շնորհէ զիս փրկելու,
 Մեղաց ախտէս ազատելու:
 Թուխ Մանուկ Սուրբ Աւետարան,
 Քրիստոնէից յոյս փրկական.
 Մօտդ կուգան շարան շարան,
 Փապակ առած ուրախ կերթան:
 Մանաւանդ եւ ես նկուն էակ,
 Սրտումս կվառէ հոր կրակ.
 Լալով խնդրեմ փրկիլու ճարակ,
 Լեցուր վառ յոյս ու փապակ:
 Սուրբ Աւետարան զօրաւոր
 Ունիս հոչակ անուն ահաւոր,
 Տոչորիմ հեծծեմ արտասուաթոր
 Փրկութեանդ կարօտ ինքս անգոր:
 Հէզ Միքայէլ Տէր Գրիգորեան,

ձեռագրերի, Էջմիածին, 1980, ԺԲ., էջ 54. Մ. արք. Աշոյան, Թուխ Մանուկ, «Թուխ Մանուկ» (նստաշրջանի նյութեր), էջ 11:

⁷⁸ Հեղինակն է Միքայէլ Տէր-Գրիգորյան, գրված է 1927 թ.: Ցուցակ Մայր Աթոռ Ս. Էջմիածնի, էջ 55. Մ. արք. Աշոյան, նշվ. աշխ., էջ 12: Նա մեջբերում է՝ առանց վերջին երկու քայտակի:

Յաշխարհի եկի անցայ ունայն,
Մահկանացու վարքն է համայն
Դու կարդացող յիշէք մի անգամ⁷⁹:

3. Ուխտաւորաց Աւետարան,
Յուսացելոց բժշկարան.
Ամեն կողմից դէպ քեզ կուգան,
Մութագ առած ետ կու դառնան:
Քեզ կը դիմեն ամեն անհատ,
Թէ հարուստներ եւ թէ աղքատ,
Աղօթք արցունք կանեն առատ,
Բուժակ դեղդ կուտաս առատ:
Ախտաւորաց բժիշկ ես դու,
Դիւահարաց սրբիչ ես դու,
Անկեալներու կանգնիչ ես դու,
Դիմողներուդ անդորրն ես դու:
Քեզ եմ դիմում Ս. Թովս Մանուկ,
Ուխտաւորաց ես դու նեցուկ,
Որք հաւատով քեզ կուպագեն՝
Յոյս եւ մութագ դերեւ չառնես:
Երկտողս կերտողս մեղաւոր եմ,
Բայց փափակով քեզ դիմում եմ,
Թող նկունիս որ գծում եմ,
Սուրբ թերթերդ շոշափում եմ⁸⁰:

Հաջորդ աղոթքը յուրահատուկ կառուցվածք ունի՝ մեկտեղված են աղոթքն, ավանդույթն ու տեսիլքը:

Էս մեր վանկը կառուծեր են այլ ազկ մատիկ⁸¹,
Հայ ժողովուրդին են նվիրել...
Անունը դրել են Թովս Մանուգ,
Սիրելի սուտպ Թովս Մանուգ ջան,
Քանի որ մենկ հայ ենկ, կանկ,
Քօ սուտպ մաղաղները ու քօ սուտպ մօմերը պըղի տանկ,
Սիրելի սուտպ Թովս Մանուգ վանկ:
Ազիզ օրերին, ուխտ օրերին ջահել աղջիկ — տղա,

⁷⁹ Հեղինակն է ոմն Սարգիս, ով հավելում է. «Գրրեցի 1935 թ.ին Զատիկ անցեալ յինգշաբտէ օր, օվ կարդա եւ յիշի ինքն էլ յիշեալ լինի Աւետարանի մոտ»: Յուցակ Մայր Աթոռ Ս. Էջմիածնի, էջ 54:

⁸⁰ Հեղինակ՝ Ամիր Շահբազյան, գրված է 1932 թ.: Յուցակ Մայր Աթոռ Ս. Էջմիածնի, էջ 55.
Մ. արք. Աշոյան, նշվ. աշխ., էջ 12-13:

⁸¹ Տե՛ս հղում 27:

Ձեռք ձեռքի տված՝ դուռդ են գալիս,
 Սիրելի սուռայ Թուխ Մանուգ ջան:
 Դու նրանձ մուրազն ես տալիս,
 Հիվանդ մատուր ձեռքը կրծկին դուռդ է գալիս,
 Նեոսիժ մի ըսպիդագ մազերով ծերունի դուռս է գալիս:
 Հույս է տալիս. «Մի՛ վախենա, դառծի գրնա,
 Ամեն ինճը լավ կլինի, դառծի գրնա»:
 Սիրելի սուռայ Թուխ Մանուգ վանկ,
 Դու նըրանը հույս ես տալիս,
 Դու նըրանը կյանկ ես տալիս,
 Ցավիժ, չոռիժ ազադըմ ես, փըրգըմ...⁸²

Երբեմն Թուխ Մանուկի անուհը կարող է հնչել նաեւ մանկական խաղերում: Տվյալ դեպքում, կարծում ենք, խոսքը սրբավայրի մասին չէ, այլ պարզապես «երեխա» նշանակությունը է ի հայտ գալիս մանկական խաղում:

Մանկական խաղի երգերի տարբերակներ

Տիտելիկ-տիտմարուխիկ,
 Զոռնալիչիկ, թուխ մանուկիկ,
 Էփե գաթայ կուկուռուճայ,
 Եղն ի վրէն ու պճպճայ,
 Հագնի իտայ, կապէ իտայ,
 Ելնայ իտայ,
 - Վիր տուն իջնայ,
 - Գուգալի տուն,
 - Էս Գուգալ,
 - Էն Մուրասդ,
 - Էն Դիլպար,

Տիտելիկ-տիտմարուխիկ,
 Զոռնալիչիկ,
 Թուխ Մանուկիկ,
 Էփե գաթայ,
 Կուկուռուճայ,
 Եղն ի վրէն ու պճպճայ:
 Ուտէ
 Խմէ
 Հագնի
 Կապէ,
 Ելնա⁸³:

⁸² Գրի առավ Գ. Հակոբյանը, ասացող՝ Ա. Եփրեմյան, նշվ աշխ.:

⁸³ Ե. Մելիքեան, նշվ. աշխ., էջ 380-381: Քանի որ Մելիքյանն իր գրքում այս երկու երգերը գրանցել է որպես մանկական երգեր, խաղը վերականգնում ենք՝ ըստ Գ. ք. Նժդեհեանցի, նշվ. աշխ., ԱՀ, հ. Ե., էջ 187-188: Այստեղ կան մի քանի մանրամասներ եւ երգի այլ տարբերակ, ուր բացակայում է «Թուխ Մանուկիկ» տողը: 6-15 տարեկան երեխաներն իրենց ձեռքերը շրջանաձև բռնում են մեկի ծնկի վրա՝ ձեռքի ափը ներքև: Նրանցից մեծը, մատով համրելով մյուսների ձեռքերը, երգում է.

Տիտելիկ (խորի դեզեր) // Տիտմարուխիկ (մի շարքի վրա) // Զոռնաթողիկ, // Էփայ գաթա // Ու կուլիչայ (բեր այս կողմ) // Եղն ի վրէն // Կը պճպճայ. // Ուրայ էնայ, // Խմնայ էնայ, // Բաշայ էնայ...

- Էն Բաղդասար,
- Էս Անոն,
- Էս Շանոն,
- Էս կատուն,
- Էս սլուկ մուկ
- Փախսի էրթայ:

Տօռօխին, տիտմօռօխին,
Ջոռնա թխին, թուխ մանուկին.
Եփի քաղա, կուպուլուճան,
Իդն ի վրէն կու պճպճայ.
Ուտէին, խմէին,
Մաշէին, ելնէին⁸⁴:

Տուտուխիկ,
Տուտ մարուխիկ,
Տամբաբազիկ,
Ջոռնափչիկ,
Թուխ մանուկիկ.
Էճրնա Էճրմ վերեն,
Մեղրը գիող՝ ըռուր վերեն,
Էնա կերավ,
Էնա խմավ,
Էնա թռավ⁸⁵:

Նախնական ընդհանրացումներ. Թուխ Մանուկները, որպես կարեւոր սրբավայրեր, մյուսների նման կարող են վկայակոչվել. ժողովուրդը կարող է երգվել նրանց անունով: Օրինակ՝ Տարոնի ժողովրդին բնորոշ էր երգվել կամ վկայակոչել ոչ միայն ծնողներին, մերձակա վանքերին, տարբեր սրբերին, այլև հատկապես Թուխ Մանուկներին եւ իրենց գյուղերի ավետարաններին, բայց ամենագործողը Ս. Կարապետն⁸⁶ էր: Ահա Թուխ Մանուկի անունով մի քանի երգում.

Յուրաքանչյուր «խտայ» ասելով, որ ձեռքին դիպավ, դուրս է գալիս խաղից: Այսպես շաբունակ, մինչեւ մի ձեռք մնա: Հետո երգողը, վերցնելով այդ ձեռքը, ցուցամատն ու ճկույթը ետ դարձնելով, բռնում է, ափը վեր անում ու հարցնում տրորելով ափի մեջ, իբրեւ թե ձվածեղ է պատրաստում եւ ավելացնում է.

*Ձու-ձու, ձրվածեղ // Սրբ-Կարապետ մաղթա գեղ: // - Վիր քուն էս քն: Ձեռքի քերք պա-
րասխանում է, // - (օր.) Կարապետին. // - Էսայ՝ Կարապետ, // - Էսայ՝ ուր կնիկ, // - Էսայ՝
ուր քոլն, // - Էսայ՝ ուրջիկ, // - Էսայ՝ կուլ, // - Էսայ՝ կթոց // - Էսայ՝ շուռ դուր փողոց:*

Երգողը, միջնամատով խփելով նրա ճակատին, երգելով հերթով տալիս է Կարապետի տան անդամների, կենդանիների, առարկաների անունները: Վերջում բռնած ձեռքի երեսակայական ձվածեղը թափում է երեսին եւ գլուխը ետ հրում:

Հեղինակը վերջում նշում է, որ վա՛յ այն երեխային, որ «վիր տուն ես քնե» հարցին սխալմամբ բազմանդամ ընտանիքի անուն է տալիս:

⁸⁴ Գ. Տէր-Աղեքսանդրեան, Թիֆլիսեցոց մտաւոր կեանքը, մասն Ա., Թիֆլիս, 1886, էջ 22: Հեղինակը կարծում է, որ այս խաղը երեսնցիներն են տարել Թիֆլիս:

⁸⁵ Ռ. Գրիգորյան, Հայ ժողովրդական օրորոցային եւ մանկական երգեր, Երևան, 1976, էջ 192:

⁸⁶ [Գ. Սրվանձտյանց], Մշոյ աշխարհ, Լումայ, գ. Ա., 1899, էջ 108:

Մեռնեմ Թուխ-մանուկի գործությանը, որ թեղի է դարձել⁸⁷։
 Ջանգոկը Թուխ Մանուկ վկա⁸⁸։
 Սուրբ Թուխ Մանուկ, դու գիտես⁸⁹։

Թուխ Մանուկը կարող է հալածել չարքերին, նույնիսկ սատանային. նրա անվան գործությունը բավական է, որ չարքը փախչի։ «Թանթոռ» հեքիաթում հերոսը թաքնվում է գոմում, իսկ մարդիկ կարծում են, թե սատանա է մտել։ Նրանք փայտերով, դանակներով, խաչերկաթներով, գոռգոռալով մտնում են գոմը, որ վռնդեն սատանային եւ գոչում են.

«Յա՛ Մշու սուլթան սըր Կարապի, դու խափանիս զգարք։
 Յա՛ Առաքելոց վանք։
 Յա՛ Թուխ Մանուկ»⁹⁰։

Եթե երգումը խախտվում էր, երգման զանցներին փորձանքներ էին սպասվում, նրանց նաեւ անիծում էին, եւ պատժողը պետք է լիներ հենց այն սուրբը, ում անունով երգումը դրժվել էր։

«Թուխ Մանուկն աչքերդ բռնի»⁹¹ անեծքը հայտնի է նաեւ Արգավանդում⁹²։

Մ. Գալշոյանի «Թուխ Մանուկ» պատմվածքի Թուխ Մանուկը թեեւ հավաքական է, իրական վայրի սրբավայր չէ, սակայն պաշտամունքն ու ընկալումները տրված են ճշգրտորեն։ Պատմվածքի առանցքը Թուխ Մանուկ մատուռի կառուցումն է Վարդո մարեի կողմից, պատերազմի ժամանակ դեպի սրբավայր կատարած ուխտագնացությունների հաճախացումը եւ երգումը Թուխ Մանուկի անունով։ Երբ Վարդո մարեն կառուցում է սրբավայրը, Գեւոն, որ կոլխոզի նախագահն էր, ծաղրում ու խոչընդոտում է նրան։ Վարդոն ուխտ է անում՝ երբեք չխոսել նրա հետ։ Ժամանակի ընթացքում Գեւոն զրկվում է իր բարձր դիրքից ու դառնում կոլխոզի պահակ։ Մի օր նրան մեղադրում են գողություն մեջ, սակայն

⁸⁷ Պ. Պոռոյան, նշվ. աշխ., էջ 414։ Ավանդությունը տե՛ս 1 էջում։

⁸⁸ Լ. Սիմոնյան, Կ. Հովհաննիսյան, Ն. Շամամյան, ԴԱՆ, Արագածոտն, Թալին-Վերին Սասնաշեն, 2015, ասացող՝ Ամալյա Հակոբյան, 1954 թ. ծնվ.։ Այսպես է երգվել իր հայրը։ Սատուում Ջանգոկ գյուղ մեզ հայտնի չէ, գուցե Ջալդակա գյուղը լինի։ Կարող է նաեւ ոչ թե րնակավայրի, այլ տեղանքի անունով է կոչվել Ջանգոկա։

⁸⁹ ԴԱՆ, Վարդենիկ, ասացող՝ Սիրուն Սահակյան, 1923 թ. ծնվ.։

⁹⁰ Թանթոռո, Հայ ժողովրդական հեքիաթներ, Երևան, հ. 10, 1967, բանահավաք՝ Բենսե, Բուլանըլի։

⁹¹ Լ. Սիմոնյան, Կ. Հովհաննիսյան, ԴԱՆ, Կոտայք, Արգել (Լուսակերտ), 2013, ասացող՝ Լյուբա Կարապետյան, 1941 թ. ծնվ.։

⁹² Լ. Սիմոնյան, Կ. Հովհաննիսյան, ԴԱՆ, Արմավիր, Արգավանդ, 2012, ասացող՝ Զորիկ Օրդուխանյան, 1947 թ. ծնվ.։

նա նախագահի հետ գնում եւ երդվում է Թուխ Մանուկում, որ ինքը մեղավոր չէ: Այդ իմանալով՝ Վարդո մարեն ներում է նրան. - «Ուրեմն Գեւոն Թուխ Մանուկ էրթալու, նրան երդվելու ա՞հ է ունեցել: Գեւո, Աստծո օրհնանք թափվի քու գլխին, լաո՛, օղորմի քու անուշ հոր... Վարդո մարեն գնում եւ մեղա է գալիս Գեւոյի առաջ. - Եկա հետդ լեզու թրջիմ, խռով-խռով չմեռնիմ: Մեղք է: Թուխ Մանուկ վկա, Գեւո...»⁹³: Վերջում խնդրում է Գեւոյին իր հետ գնալ Թուխ Մանուկ՝ մեղքերին թողություն խնդրելու:

Այսպիսով, հիմնվելով բանահյուսական նյութի վրա՝ կարելի է փաստել, որ ժողովրդի մեջ առկա են պատկերացումներ Թուխ Մանուկի, նաեւ՝ սրբավայրի առաջացման եւ զորության մասին: Նրան հղվում են աղոթքներ, ձոնվում են երգեր, վերջապես նրա անունով երդվում եւ անիծում են:

Ավանդությունների մեծ մասում Թուխ Մանուկն այլազգի կամ այլադավան մի երեխա է, որին սպանել են քրիստոնեություն ընդունելու համար: Այլ ավանդություններում Թուխ Մանուկը Քրիստոս է:

Երգերում արտահայտվում է Թուխ Մանուկների երկնային զորք լինելը: Դրանցում Թուխ Մանուկին, ի թիվս այլ սրբավայրերի, դիմում են արհավիրքներից ազատվելու, սիրո մեջ երջանկություն գտնելու նպատակով:

Թուխ Մանուկին ուղղված են նաեւ ժողովրդական աղոթքներ, որոնցում նրանից բժշկություն, պահպանություն ու պաշտպանություն են խնդրում իրենց եւ աշխարհի համար:

Տեղադրությունը	Սրբավայրի տեսակը	Կերպարը	Գործառնությունը
Համգա-Շեյխ, Բուլանդի	Մատուռ	Քուրդ շեյխի նահատակված որդի	Անհայտ
Աշրարակ, Արագածոտն	Հնձնարագ եւ թեղի ծառ	Պարսիկ մոլլայի նահատակված որդի	Սիրահարների հովանավոր
Գեղհովիտ, Գեղարքունիք	Մատուռ, այժմ՝ եկեղեցի	Սեւ մաշկով մանուկ	Զավակատու, ճանապարհորդների հովանավոր, զինվորների պահապան, բուժիչ
Ալափարս, Կուրաթ	Մատուռ, ջրի ակ	Հիսուս Քրիստոս	Զավակատու, բուժիչ, զինվորի պահապան
Արևշար 1, Արարատ	Մատուռ	Հիսուս Քրիստոս	Զավակատու, զինվորի պահապան, բուժիչ

⁹³ Մ. Գալշոյան, Թուխ Մանուկ, Զորի Միրոն, Երևան, 1983, էջ 159-166:

Մասպարա, Արագածուրն	Մատուռ	Հիսուս Բրիստոս	Զավակատու, զինվորի պահապան, գերմարդկային ուժ տվող, բուժիչ
Հացաշեն, Արագածուրն	Մատուռ	Աստված՝ եկած սեուկ մանուկի տեսքով	Զավակատու, զինվորի պահապան, բուժիչ
Կապուրան, Կուրայք	Ժայռ, մենհիր	Սեուկ երեխա	Զավակատու, զինվորի պահապան, բուժիչ
Պրլնի, Կուրայք	Եկեղեցու հիմք	Նահատակված քույր ու եղբայր	Զավակատու, զինվորի պահապան, բուժիչ
Արեշապ 2, Արարապ	Գետաքարերի կույտ	Երեք քույրերից մեկն է՝ կուս Վառվառը	Զավակատու, բուժիչ
Վարդենիկ, Գեղարքունիք	Մատուռ	Թուխ տղա	Զավակատու, երեխաների խնամող, զինվորի պահապան, բուժիչ
Լիճք, Գեղարքունիք	Մատուռ	Տղա երեխա և Ջորավար Անդրանիկ	Զավակատու, զինվորի պահապան, բուժիչ
Կարմիրգյուղ, Գեղարքունիք	Մատուռ, գերեզմանատուն	Քառասուն մանուկների կրտսերը՝ թուխ տղա	Հանգուցյալի հիշատակի և զինվորի պահապան, զավակատու, բուժիչ
Մեղրաձոր, Կուրայք	Թեժառույթի վանք, տանձենի, քարակույտ	Նահատակված ջիւղ եղբայր և երկու քույր	Զավակատու, զինվորի պահապան, բուժիչ
Վարդենիս, Գեղարքունիք	Մատուռ	Կախարդական պաշտպան	Զավակատու, զինվորի պահապան, պաշտպան, բուժիչ
Շիրակ	Եկեղեցի	-	Սիրահարների հովանավոր
Ալաշկերտ	-	-	Արհավիրքներից (մասնավորապես կիտուռից) պաշտպան
Ալաշկերտ	-	Նահատակ- զինվորների հոգիներ	Ազգի պաշտպան
Վան	Մատուռ	Հասուն տղամարդ	Զավակատու, տղա երեխաների պաշտպան
Տաթև		Ալետր ծերունի	Զավակատու
Քուչակ-Չամղու, Արագածուրն	Մատուռ	Մուրք Կարապետ	Զավակատու, զինվորի պահապան, բուժիչ, ճանապարհորդի պահապան

Աղյուսակ 1. Թուխ Մանուկների տեսակային, կերպարային
և գործառնության տիպաբանությունը

Սրբավայրի տեսակը	Կերպարը	Գործառույթները
Մատուռ - 12	Հիսուս Քրիստոս - 4	Զավակատու - 14
Եկեղեցի - 3	Ս. Կարապետ - 1	Բուժիչ - 13
Վանք, տանձենի - 1	Այլազգի երեխա - 3	Զինվորների պահապան - 13
Հնձան, թեղի - 1	Թուխ երեխա/պատանի - 5	Սիրահարների հովանավոր - 2
Ժայռ, մենհիր - 1	Նահատակ զինվորների հոգիներ - 1	Ազգի պաշտպան - 1
Քարակույտ - 1	Կախարդական պաշտպան - 1	Արհավիրքների պաշտպան - 1
	Հասուն մարդ - 1	Հանգուցյալների հիշատակ պահող - 1
	Ալետր ծերունի - 1	Ճանապարհորդների հովանավոր - 2
	Կույս Վառվառա - 1	
	Տղա երեխա եւ Զորավար Անդրանիկ - 1	

Աղյուսակ 2. Թուխ Մանուկների տեսակային, կերպարային եւ գործառույթային տիպերի քանակական պատկերը

РЕЗЮМЕ

Святыни Тух Манук широко распространены в Армении. Эти святыни существенно разнятся как сооружения и объекты культа. Часто ритуалы имеют мифическую основу, но иногда могут быть основаны не на мифе. В культе Тух Мануков доминирует именно последний тип: ритуальные действия в основном остаются вне нарративного дискурса, т. е. мифология Тух Манука имеет самостоятельное, не связанное с ритуалом значение.

Основываясь на фольклорных материалах, можно сказать, что в народе существуют представления как о том, кто есть Тух Манук, так и о том, как возникло святилище, каким могуществом оно обладает: к нему направлены молитвы, ему посвящаются песни, наконец, его именем клянутся и проклинают. В большинстве легенд Тух Манук является ребенком, представителем другого этноса или веры, которого убили за принятие христианства. В других легендах Тух Манук есть сам Христос. В песнях выражается сила и мощь Тух Мануков, которые представляются как небесное воинство. К Тух Манукам, в ряду других святилищ, обращались так же, чтобы спастись во время катаклизмов, быть счастливыми в любви. Тух Мануку направлены молитвы, в которых у них просят излечения, защиты и сохранности для себя и для всего мира. Наряду со снами и видениями, фольклор связанный с Тух Мануком, является важнейшим источником для понимания этого образа.

SUMMARY

Shrines named Tukh Manuk are widely distributed in Armenia. They differ in construction and in character of worship. Often rituals have mythical reasoning but sometimes they may exist independently. In the cult of Tukh Manuk the last type of interrelation between the myth and the ritual prevails, i. e. the mythology of Tukh Manuk has its own significance that is not connected to the ritual.

Researching folk-lore materials one may outline that there are folk imaginations on who is Tukh Manuk as well as on the origin of the certain shrine and the kind of his power. There are prayers appealing to him, songs dedicated to him, at last, one swears and curses in his name. In most legends Tukh Manuk is a child, a representative of an alien ethnic or religious group, who is killed for adopting Christianity. In other legends Tukh Manuk is the Christ himself. In the songs the might and power of Tukh Manuk is expressed to be represented as the heavenly host. People asked Tukh Manuk shrines, like to other holy places, to save them in disasters, to find happiness in love. There are popular prayers directed to Tukh Manuk, in which one asks healing, protection and safety for the own and for the whole world. Along with dreams and visions, folk-lore connected with Tukh Manuk is a very significant source to reveal the essence of the phenomenon.

